



Tir Yimyim

www.tiryimyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimyim@gmail.com

TAPAK 6

Yangia anidakangma :



Tir Yimyim



tiryimyim@aolima



tir yimyim

TAPAK 7

Lt Gen Tiwari-i Mizoram governor & Chief Minister na den ajurutep

Vietnam nung tir inyaksü To Lam shimogo



VOL. XXI ISSUE NO. 220 (ADOK 220) DIMAPUR YANGTEPNÜ (THURSDAY) MONUPII (MAY) 23, 2024 ₹ 5.00

India nung driving license inyakyim melenshir

New Delhi, May 22, 2024 (Agencies): India nung driving license agizükba inyakyim tasen kar Ministry of Road Transport and Highways (MoRTH)-i metetdaksüogo.

June 1, 2024 nungi driving license aginürtemi Government Regional Transport Office (RTO) nung driving test atema aotsü nungdak madoktsü. Sorkari nija rejutem nem tests agitsü aser certificates agütsütsü tashi agütsüogo.

Driving license aginürtemi regional transport offices (RTOs) nungmesüra nijareju ka nung driving test sür license agizüktsü akok.

June 1, 2024 nungi license shitak mali ser gari anishiba atema senchi teimba achitsü. Iba abelen atema Rs 1,000 nungi Rs 2,000 tashi achitsü. Maneni, tanur kati gari anishiba putetra tanur tsüraburtem merenshitsu aser Rs 25,000 senchi achitsü. Ketdangsürtemisa gari indang registration certificate meypa agitsü.

MoRTH-isa driving license agizüktsü atema kulikakettem tiptemogo aser parnoki license balala atema nungdakba kulikakettem metetdaksütsü.

India nung gari lenmangtem nung mokozü ajema kumdaksütsü atema MoRTH-isa sorkar gari tejoen 9,000 shi ka agientsü lenmang bushitepdar.

Driver's license atema application agütsüba maparen kasa dang asütsü aser online ajanga Ministry of Road Transport and Highways-https://parivahan.gov.in/ nung agütsütsü ako. Ano pei pei RTOs nung manual process ajanga application agütsütsü akok.

MoRTH-i temzüng tasen yanglubu nung driving training centres ket nung ali acre 1 bosa alitsüla. Ajisüaka centre temi four-wheelers atema driving tests agira ali acre 2 bosa alitsüla.

Driving centre temi Light Motor Vehicles (LMV) atema hopta pezü nung ghonda 29 training agütsütsüla. Heavy Motor Vehicles (HMV) atema hopta 6 nung ghonda 38 training agütsütsüla ta MoRTH-isa ashi.

Temzüng tasen ajanga learner's license (Form 3) Rs 150 aser learner's license test mesüra repeat test Rs 50 talila agitsü. Nisung kati driving test mezüra repeat test aginüra Rs 300 agitsü.

Driving license indang jenjangji Rs 200 asütsü aser international license atema Rs 1,000 agitsü. Nisung kati pa/la license nung gari tanga ka bendenloknüra Rs 500 agitsü.

Driving schools-i training magii licenses renew sütsüra Rs 5,000 fee meshitsü ta MoRTH-isa metetdaksüogo.

Vice President-i Iran President Raisi asüpila sentong nung aden



New Delhi, May 22, 2024 (Agencies): Vice President Jagdeep Dhankhar-i Bodbarnü Iran acting President Mohammad Mokhber den ajurutep aser President Ebrahim Raisi o Foreign Minister Hossein Amir-Abdollahian na ajungbena asüba atema mangyimba lemsatop.

Jagdeep Dhankhar-i anir India nungi teshimtet telok kati Raisi, Amir-Abdollahian aser tanga Iran ketdangsürtem nem tetushi agütsüba official funeral

ceremony nung aden. India nunga Mongulbarnü Raisi nem akhümtsübu agütsüba sayua 'one-day state mourning' agia liasü.

President Droupadi Murmu aser Prime Minister Narendra Modi natia Raisi asüba atema mangyimba osang metetdaksü.

Mongulbarnü External Affairs Minister S Jaishankar-i New Delhi nung Iran Embassy semdanga liasü aser idangji India'er tasürtem atema mangyimba osang lemsatop.

Bodbarnü Iran nung supreme leader Ayatollah Ali Khamenei-i helicopter lendong nung asürtem-president Raisi, foreign minister Amir-Abdollahian aser tangartem den asüpila sentong ka ketdangsüa agiogo. Iba sentong nung nisung meyrjang aika aden.

Deobarnü arishi küm 63 tain Raisi den ketdangsürtemi Azerbaijan-Iran arrtsü nung tesem ka semdangar Tabriz city-i aodang len tom nung parnok amenba helicopter tsükok.

Kohima nung Northeast Startup Catalyst sentong agir

Dimapur, May 22, 2024 (TYO): May 22, 2024 nü Auditorium, NIELIT Kohima nung Northeast Startup Catalyst Program tenzükogo.

Iba sentong nung Industries & Commerce Director P. Tokugha Sema-i tetushi süa jaoker ama shilem agia liasü.

Iba sentong northeast nung innovation aser entrepreneurship ajungkettsü atema lir. Iba mapa ajanga start-ups yariba dang masü saka Nagaland aser Northeast region ajungalen entrepreneurial ecosystem tashi itdaksür, ta pai ashi.

Nagaland nung incubators 5

lir aser itemji start-up Nagaland o NIELET kübok lir. Incubators 5 ajanga temelenshi bener arur aser incubator shiai start-ups aniteta nung tongtipang shilem agir, ta Tokugha-i ashi.

Paisa lennirtem aser policy yanglurtem dang start-ups yaritsü aser len anitsü ayongzük.

NEILIT-i iba ama tajangzük aliba sentong ayongzükba atema Industries & Commerce Director-i tenüngsang agütsü.

Northeast Catalyst Program nung Aizawl, Kohima, Guwahati aser Imphal nungi start-ups 16 aser nisung 23 shilem agir.

Lok Sabha elections nung candidate 8,360 lir

New Delhi, May 22, 2024 (Agencies): Lok Sabha elections nung candidate ajak agi 8,360 lir aser iba ya 1996 sülen nungi candidate teimtiba lir.

1996 election nung candidate 13,952 liasü aser iba sülen taküm teimtiba tokteper.

2024 general elections ya shilem 7 lemsar agir aser tang tashi nung shilem 5 temogo. May 25 nung shilem trokbuba aser June 1 nung shilem tenetbuba agitsü. Iba sülen June 4 nü votes azüngtsü.

May 13 nü shilem pezübuba nung candidate teimba liasü. Iba anogo states aser Union

Territories (UTs) 10 nung parliamentary constituency 96 nung polling süa liasü.

1996kümLokSabhameden543 atema candidate 13,952 liasü aser ibaji menden shia candidate 25.69 liasü.

Ajisüaka, Election Commission-i security deposit Rs 500 nungi Rs 10,000 ajungketba ajanga 1999 Lok Sabha elections nungbo candidate 4,648 dang aküm.

Iba sülen 2004 Lok Sabha elections nung candidate 5,435 aser 2009 küm 8,070 candidates liasü. 2014 Lok Sabha election nunga candidate 8,251 liasü.

State ketdangsürtemi tzüngluruwa mongpu atema renemshir



Dimapur, May 22, 2024 (TYO): Nagaland chief secretary aser State Executive Committee (SEC), NSDMA chairman J. Alam-i tzüngluruwa mongpu atema video conference ka agiogo.

Chief Secretary Conference Hall nung senden amandang DGP Nagaland Rupin Sharma, ADGP Nagaland Renchamo, Home Commissioner Vikeye aser Commissioner & Secretary Lhouchalie Viya nung aden.

Iba video conference nungsa Deputy Commissioner aser District Disaster Management Authorities (DDMAs) Chairperson ajak aden.

District shia nung renema alitsü aser talisa jangotsü, nungdakba mozütem, petroleum, totzü aser lubricants (PoL) amala

rizünga ayuba den lenmang tesentaktep tajung alitsü atema tanü senden nung benoka lemsatopogo.

Chief Secretary Alam-isa kilentsü ayimdak merüktetsü aser culverts sadema lapoktsüba ashi. Paisa DDMAAs dang sorkar department balala den amalitepa item mapa inyaksü ashi.

Tzünglu aruba ajanga lenmangtem noktangsüsa tensa ajurudang amshitsü atema nungdakba osettem tesem balala nung renema atatsüla. Talisa Deputy Commissioner aser DDMA Chairperson temi tanga department tem den amalitepa mapa inyaksü aser Interagency Groups (IAGs) tentetsü atema CM Alam-isa metetdaksü.

Interagency Groups (IAGs) nung civil society members aser

NGOs adentsüla aser iba telok ajanga osang belenshiba den disaster management maparen ketdangsüa inyaksüla ta paisa ashi.

District preparedness review senden amenba sülen National Highways and Infrastructure Development Corporation Limited (NHIDCL) aser State Public Works Department (PWD) ketdangsürtem den olemtep mapang agia liasü.

Commissioner and Secretary Works and Housing K Yhome aser pei pei Chief Engineer temi anir iba senden nung aden.

Senden nungsa Urban Development and Municipal Affairs Commissioner and Secretary Kenilo Apon den Urban Development Department aser NSDMA ketdangsürtem aden.

Chümoukedima district atema Integrated Health Campaign tenzükogo



Dimapur, Monupii/May 22 (TYO): Lendong nung aliba niburtem nem health services angati aser tekeratiba nung agütsütsü nükjidong nung Nagaland State AIDS Control Society (NSACS) ajanga Deputy Commissioner, Chümoukedima indang office nung May 22, 2024 nü Integrated Health Campaign tenzükaga liasü.

Iba campaign ya ita ana atema alitsü aser iba mapang anasa aliba district ajunga awajemtsü aser iba mapang counselling, TB screening, HIV, Syphilis, HBV, HCV tendangba, diabetic, Hypertension, Anaemia tendangba aser niburtemi nungdakba service tem agütsütsü.

Chümoukedima ya district tasen ka asünung, maparen ajak

tajungtiba nung inyaksü asoshi niburtem nungdakba nung ajemdaker CMO Office amenoktsü nungdakker, ta ADC Chümoukedima, Dr. Kuzonyi Wideo, NCS ajanga iba sentong nung ashi.

Pai civil societies, NGOs, tribal council tem dang item facilities agütsüba indang sangdongtsü aser akok tashi yaritepa awareness agütsütsü ayongzük.

Iba campaign ya India nung aliba state ajunga asoshi kanga junga asadanga yangluba sentong ka lir aser talisa North East nung ranglok, ta Project Director, NSACS, Dr. Ahu Sekhose-i ashi.

Iba sentong nung Deputy Director, STI & Nodal Officer, IHC, NSACS, Dr. Zaiwang ajanga Chümoukedima district nung IHC indang presentation

agüja liasü.

Chümoukedima district nung nisung nütsüng yongsük 1,54,410 lir aser March 2024 tashinung takum aser ART nung nisung 1,861 lir ta lai ashi.

April 2023 nungi March 2024 tsüngta nisung 17,162 dak HIV tendanga liasü aser yangji General client 14,783 aser ANC 2,379 lir aser iba mapang nisung 168 dak putet, ta lai ashi.

Iba mapang Camp 23 agütsü, yangji Extended Camp 21 aser Main/Static Camp ana aser Camp ya May 22, 2024 nungi June 26, 2024 tashinung agütsü.

Iba sentong nung CMO, Chümoukedima, Dr. Yartenla-i pela agizükba o jembi aser District AIDS Control Office (DACO), Dr. Benchilo Ngullie ajanga melepzüng o jembia liasü.

NPF working president Dr. Huskha Yepthomi asükhu lemsateper

Dimapur, Monupii/May 22 (TYO): Naga People's Front indang Working President, Dr. Huskha Yepthomi May 21, 2024 nü Zion Hospital and Research Centre Dimapur nung asüba osang angashia temulung shiranger, ta Nagaland Chief Minister Neiphiu Rio-i sangdong ka ajanga ashi.

Dr. Huskha ya nendaka inyakba aser temeim aketba lenir ka liasü, shibai niburtem ajungtsü asoshi kanga bilem. Pa tamale nungi lokti tentet balala tenzükaga aru aser pa meteta alirtemi pa teti menungratsü, ta ashi.

Pa asüba ya Naga People's Front party, Naga nunger talisa Sumi nunger asoshi takoksa tulu lir. Pa asüba ajanga tazüng adokba süngdaksütsü kanga tasak asütsü. Pa asenok den maliba ajanga asen mulung

ayanger, saka pai mapa tajung inyakba asenoki teti bilemtetti, ta CM Rio ajanga ashi.

Tang mangyimba mapang ni aser ozü kibongi kinungertem den asükhu lemsateper. Tulusang tsüngremi nenok nem anisüngzük aser tasü tait mulungsentsü agüjang aser asür tanüla teti tatem maka tesunep nung anisüngzükjang ta sarasademer, ta paisa ashi.

NPF indang working president Huska Sumi mapang talangka shiranga arur yasüng Dimapur nung asüba osang angashia temulung shiranger, ta Deputy Chief Minister, T.R.Zeliang-ia sangdong ka nung ashi.

Yimtenren nung dang masü danga maparen balala nunga asür Huska den mapang talangka nungi metettepa külemi inyaka aru. Asür Huska Sumi ya ochishir, dangar mulung atsür

arutsüsa sempet tajung keta liasü aser teti dangar yarinüa aliba nisung ka liasü, ta Zeliang-i ashi.

Mangyimer kibong den asükhu lemsateper aser asür Huska den temeim lemsatepa bilemteta temulung nung anisüngzük angutsü sarasademtsür, ta pai ashi.

Naga People's Front indang working president Dr. Huskha Yepthomi asüba atema mang ayimer, ta NPF Minority Wing ajanga sangdong ka nung ashi.

Pa asüba osang angashia NPF party nung inyaker ajak aoksar, aser ibai state asoshi aser talisa party asoshi takoksa tulu alitsü, ta ashi.

Mangyimer kibong den asükhu lemsateper aser asür tanüla tesunep nung anisüngzükjang ta sarasademtsür, ta NPF Minority Wing ajangasa ashi.

Niuland nung Integrated Health Campaign tenzükogo



Dimapur, Monupii/May 22 (TYO): Deputy Commissioner, Niuland, Sara S Jamir-i May 22, 2024 nü Deputy Commissioner, Niuland indang Conference Hall nung Integrated Health Campaign tenzükaga liasü.

Iba sentong nung tongti tesemdang ka ama jembidang, niburtem aser linük aintsü atema niburtem temang anema alitsü nungdakker aser niburtem temang anema alitsü atema health care facilities shidak nungdakker, ta DC Niuland ajanga ashi.

Niuland ya district tasen ka asünung, tang tashi District hospital ka mali aser iba campaign takok angutsü atema stakeholders, talisa medical ketdangsür temi district kübok meta balala nung niburtemtonga aotsüla, ta DC Niuland, Sara S Jamir-i ayongzük.

HIV/AIDS aser TB tashidak indang tebilemstü atema jembidang, tashidak dang nungi niburtemi mesü-mokonga bilemba aser bendanga amshiba ya tamajungba lir, anungji

department-i district nung awareness campaign tajung agütsüla, ta lai ajungshi.

Iba sentong tenzükaga Project Director, NSACS, Dr. Ahu Sekhose-i iba campaign nükjidong rateta ashi aser Deputy Director, STI & Nodal Officer IHC, NSACS, Dr. Zaiwang-i Integrated Health Campaign indang presentation ka agüja liasü.

Sentong nung menden Dr. Benchilo Ngullie-isa tepela o jembia liasü.

DC Mon-i District Co-operative Development Committee senden ayonger

Dimapur, Monupii/May 22 (TYO): District Co-operative Development Committee (DCDC) indang senden ka May 24, 2024 nikongdang 1:00 ako nungi tenzükaga Sub-Divisional Officer (Civil) Hq indang Office Chamber nung amentsü, ta Deputy Commissioner Mon, Ajit Kumar Verma, IAS ajanga sangdong ka nung metetdaksü.

Iba senden nung Project Director, DRDA; Additional Deputy Commissioner, Mon;

Assistant Registrar of Cooperative Societies; Chief Veterinary Officer, Mon; District Fishery Officer; District Agriculture Officer; District Horticulture Officer; District Sericulture Officer; District Development Manager (DDM), NABARD; Assistant Director of Supply, F&CS; Branch Manager, NSCB Ltd aser FCI nungi teshimtet nübu adentsü, ta sangdong ajanga ashi.

I&C Department ketdangsür atema seminar ayongzük

Dimapur, Monupii/May 22 (TYO): Subsidy policy tasenba Uttar Poorva T r a n s f o r m a t i v e Industrialization Scheme UNNATI 2024 indang district ketdangsür nem angatetdaksütsü mechi seminar ka May 22, 2024 nü Directorate of Industries & Commerce, Kohima nung ayongzükaga liasü.

Iba sentong nung Addl. Director of Industries & Commerce, Er. Lipongse Thongtsar menden liasü aser Director, Industries & Commerce, P. Tokugha Sema ajanga iba seminar ayongzükba nükjidong lemsatep.

Technical session nung shisalen sayur ya Saurav Sahewalla, Chartered Accountant liasü.

Assam Rifles temi sentong balala ayongzük

Dimapur, Monupii/May 22 (TYO): Assam Rifles temi Rifleman/General Duty (Late) T Gokil Singh, SM (P) nem akum agütsüba sentong ka May 22, 2024 nü Kohima nung aliba Unit War Memorial nung agia liasü.

Rifleman/General Duty (Late) T Gokil Singh yagi May 22, 2014 nung Tamenglong district, Manipur kübok Nungba tesem nung linük asoshi takum bendanga agüja liasü.

Iba sentong nung Officers 7, JCOs 19 aser ORs 135 arua telungpur den raradang takum bendanga agütsüsang nem akum tetushi agüja liasü.

Ano Unit War Memorial, Tuensang nunga JCO ka aser danga rank nung alir sepai pongu nem akum agüja nung yutsüba sentong ka Bodhbarnü agia liasü.

Par trok ya Joupi, Manipur nung alidang May 22, 2016 küm telungpur temi Hengshi Post, Joupi anasa Administration convoy amaktsü aliba sentong raksatsüadang takum bendanga agüja liasü.

Iba sentong nung Officers pezü, JCOs 21 aser Battalion nungi danga rank nung alir sepai 178 dena liasü aser parnok dang par trok-i takum bendanga agütsüba indang otsü ashi.

Sepaitemi tasü ita takum bendanga agütsüba asoshi akum tetushi agüja Assam Rifles temi Diyun Village, Changlang, Arunachal Pradesh nung May 22 nungi 25, 2024 tashi 'Sons of Soil Week' ayongzük.

Iba sentong nung shilem ka ama Assam Rifles temi Asür Rifleman (GD) Avatar Chakma, PMG (Posthumous),

19 Assam Rifles nem akum agüja nung yutsüba sentong ka agia liasü.

Asür Avatar Chakma ya May 22, 2021 nü Changlang, Arunachal Pradesh nung operation ka agidang linük asoshi pa takum bendanga agüja liasü.

Iba sülen Late Rfn (GD) Avatar Chakma, PMG nungtem nung football tournament ka Sampoi Village, Diyun Circle nung tenzükaga liasü.

Iba sentong nung yimtsüng balala nungi nisung 1,050 arua aden, kong Namsai aser Changlang district tem nungi team ter arua tokteper.

Iba den külemi hopta tepiyong Unity & Peace rallies ayongzüktsü, aser tesem balala nung medical camp tem ayongzüktsütsü.

Kasa anogosa St. Stephen's Higher Secondary School, Dimapur nung azünger kaketshirtem asoshi Assam Rifles temi "A Day with Company Commander" nungja agütsür sentong ka ayongzükaga liasü.

Iba sentong tenzükaga kaketshirtem ajungmesoa o jembi aser iba sülen Jazz Band ajanga ken aten aser Assam Rifles movie sayua liasü.

Maneni Tug of War, Musical Chairs, aser Balloon Shooting amala inyakyim ayongzükaga liasü.

Assam Rifles aser Nagaland nung aliba lanurtem tsüngta tesendaktep tali tashi itshtitsü nükjidong nung kaketshir temi Quarter Guard semdanga liasü.

Iba sentong nung kaketshir 30 den tesayur ana arua shilem agia parnok nem armed forces indang yimya balala angazükdakga liasü.



May 22, 2024 nü Udaipur nung BJP lenir aser taoba mapang Himachal Pradesh chief minister, Jairam Thakur den Mandi constituency nungi BJP candidate, Kangna Ranut aser tangartem election nüboyim sentong ka nung tangokba noksa nung angur.

Yimsü aser kin nung ajemdaker nübo mayimtsüla: EC

New Delhi, May 22 (Agencies): Lok Sabha elections joko shilem ana dang agitsü lia Bodhbarnü Election Commission-i national party tulutiba ana- Bharatiya Janata Party (BJP) aser Congress na dang tamangba yimsü mesüra kin nung ajemdaker nübo mayimtsüla, ta metetdaksü.

Election Commission-i party anaprongla dang tamangba yimsü, kin aser oshi-open nung ajemdaker vote mayimtsüla, ta tekümdangtesü metetdaksü.

Ajisüaka EC ajanga tekümdangtsü tetuyuba agütsüba ya election shilem pongubo agiadoker joko election shilem ana nung menden 114 atema dang election agitsü lia metetdaksür.

Election Commission-i, election ajanga India nunger

loktiliba-sobaliba takoksa mengudaktsütsüla, anungji party anapronglai ibaji temelung nung ayutsüla, ta ashi.

Ita ka tejaklen Rajasthan kübok Banswara nung election nüboyim sentong ka nung jembidang Ato kilonser Narendra Modi-i telemsa adokdaksütsüsa o jembigo, ta Congress-i tai tonglokja EC nem metetdakja liasü, ajisüaka BJP-i ato kilonser pusema jembibaji Election Commission-i magizük. Election Commission-i BJP aser party nung lenirtem dang tamangba yimsü mesüra kin nung ajemdaker nübo mayimtsüla mesüra loktiliba nung telemsa adokdaksütsüsa o mejembitsüla, ta tekümdangtsü metetdaksü.

Tamalen Election Commission-i Congress Tir,

Mallikarjun Kharge danga tekümdangtsü o metetdakja liasü. BJP-i Congress lenirtemi jembiba o ashishia EC nem metetdaksü. Rahul Gandhi-i jembiba oji Kharge-i pusem ajisüaka Election Commission-i magizük. EC-i Congress dang linük sepaitem dak sendakba nung politics maitdaksütsüla aser telemsa adokdaksütsüsa o mejembitsüla, ta metetdaksü.

Election Commission-isa Congress dang party atema nüboyim sentong nung shilem agia o jembirtem aser candidate tem dang linük temzüng ya agientsü mesüra yokadoktsü ta mejembitsüla, ta tuyu.

EC-i BJP aser Congress naprongla nung Tirtem dang nüboyim sentong nung shilem agirtem nem item tekümdangtsü metetdakjang, ta tuyu.

INDIA teloktep nung PM akümtsüsa lenir ka danga mali: Amit Shah

Ghatal, May 22 (Agencies): Bodhbarnü Union home minister Amit Shah-i opposition INDIA teloktep aija, Ato kilonser akümtsüsa opposition teloktep nungi lenir ka danga mali, ta ashi.

Ghatal nung Lok Sabha election nüboyim sentong ka nung jembidang Shah-i, INDIA teloktep nung lenirtemi parnok chirnurtem tejakleni odaktsüner saka linük anitsüsa parnok rongnung lenir ka danga mali mesüra linük nung terenlok mapa inyaksü asoshi parnok nükjidong mali," ta ashi.

Pakistan-occupied Kashmir dak sendakba nung pai, "PoK ya India shilem ka lir, anungji onoki tanaben meyipa agitsü," ta metetdaksü.

"INDIA teloktep nung lenirtem ka danga mali. INDIA teloktepi küm pongu nung Ato kilonser pongu aginer," ta pai metetdaksü.

BJP lenirisa, tang agiba Parliamentary elections ya kibong politics lenirtem mesüra linükji par kibong ama züngshir ochishir lenir, Narendra Modi na rongnung

ka shimba election lir, ta ashi. "Sharad Pawar-i par jala chief minister kümdaktsüner. Mamata Banerjee-i lar adianu chir ka la melenzükdakja chief minister inyakdaksüner. Stalin (Tamil Nadu CM)-i par jabaso nem pa melenzükdaksüner. Sonia Gandhi-i Rahul Baba Ato kilonser kümdaktsüner. Ano külen linük ajak par kibong ama züngshir Narendra Modi lir," ta Shah-i ashi.

Paisa, "Pakistan-occupied Kashmir ya India shilem ka liasü aser onoki iba ya tanaben agitsü," ta metetdaksü.

Rahul Gandhi-i China ketdangsertem miima ajurur: EAM Jaishankar

New Delhi, May 22 (Agencies): External affairs minister, S Jaishankar-i, Rahul Gandhi-i China nunger ketdangsertem ajurur, aser parnok den miima senden amener, anungji pai kidanger linük indang alakteta meteta alitsüa akok, ta ashi.

Interview ka nung jembidang Jaishankar-i, "Rahul-i China junga angateta alitsüa akok, kechiyong pai China ketdangser den miima senden amener," ta ashi.

Congress lenir Rahul-i, Jaishankar-i China den linük tesendaktep onüktem memetet, ta tamalen aitsüba dak sendakba nung Jaishankar-i iba o ya jembia.

Mezüngbo Congress-i iba senden indangji memetetdaksü, ajisüaka Chinese embassy-i Rahul Gandhi aser China nunger ketdangser na külemi tangokba noksa ka lemsatapa liasü.

Interview nungji jembidang Jaishankar-i, India nunger kaketshirtem raraba tesem nungi anitetsü atema Ato kilonser Narendra Modi-i Russia Tir, Vladimir Putin den jembiba ajanga Russia nunger sepaitemi amakba anena ata, ta ashi.

Jaishankar-i, tesüiba küm ter tsüngda alima sabang nung India ajungketogo aser India-i jenjang tasen aika tongtetogo, ta metetdaksü.

"Kuli ka dang masü saka aika

lir. Kuli kaji, lenir ka jak repranger linük ka meteter. Asenok tia kaa Modi-i alima tesem ajaklen India indang jembir, aser ibaji ajanga asenok kanga tajanzük nguogo," ta pai metetdaksü.

Jaishankar-i, "Akhidang Congress aibelen ajanga 1962 küm China-i India amak aser India nunger litsü agi. Nehru-i China policy renemba mapang nung Sardar Patel-i pa anema nokdak. Nehru cabinet nunga minister aikati pa anema liasü. Tesülen Aksai Chin lenmang yangluba mapang nung Parliament nung o kanga entepa liasü. Nehru indang foreign policy anema o lemtepa liasü," ta metetdaksü.

KOHIMA ONGPANGKONG TELONGJEM



18 BUBA N.I. JAMIR
ACADEMIC EXCELLENCE AWARD

25th
May 2024
10:30 Ako (Anepdang)
Capital Convention Centre
New Secretariat, Kohima

Makjudong: Takotet Kaketshir

TONGTI O JEMHIR:
Wb. A. PANGJUNG JAMIR
Hon'ble Advisor
Fisheries & Aquatic Resources, Nagaland

SENTONG LENIR:
Sb. TAKANUNGSANG
Kr. TIAMONGLA KICHU

AWARD ANGURTEM:

1. Kr. Moamenla B. Kichu (Aliba) - 9th
2. Sb. Benjungakum Jamir (Merangkong) - 9th
3. Kr. Chendila Walling (Khar) - 10th
4. Kr. Suyaben Longkumer (Ungma) - 10th
5. Kr. Tajungren Imsong (Longjang) - 12th
6. Sb. Moaakum T. Longkumer (Dibuia) - 12th
7. Kr. Aiensen Aier (Mopungchuket) - 13th
8. Sb. Imlibong Jamir (Sungratsu) - 14th
9. Kr. Nukshirenla Kichu (Khensa) - 14th
10. Kr. Tiarenla Longkumer (Merangkong) - 14th
11. Kr. Tiainla (Dibuia) - 14th
12. Sb. Imkongsungit Jamir (Merangkong) - 17th
13. Sb. Liropong Ao (Khar) - 17th
14. Kr. Imkongsenla Longkumer (Changtongya) - 17th
15. Kr. Imjunglila Jamir (Khar) - 19th
16. Sb. Temsujungba (Khar) - 20th

SENTONG

1. Sarasademsü : **Wt. Alice Walling**
Associate Pastor, Christian Education KABA
2. Telok pela agizükba : **Wb. Alemküzük, Tir, KOT**
3. Tajungshi O : **Wb. T. Chubayanger, Tir, KAT**
4. Temeja Ken : **Kr. Putulemla Kichu**
5. Award agütsüba mapang : **Wb. Nokchasashi**
Convenor, NIJT Board of Governors
6. Award angurtem O : **2 Minutes each**
7. Award angurtem aser Aor Kaketshirtem asoshi temoatsü meshia sarasademsü : **Wb. O Sashi Ozükum**
Pastor KABA
8. Tongti O : **Wb. A. Pangjung Jamir**
Hon'ble Advisor, Fisheries & Aquatic Resources, Nagaland (20 minutes)
9. Melepzüng O : **Wb. Temsu Soyah**
Secretary, NIJT Board of Governors
10. Tatem sarasadem : **Telok**

Post Programme
An interactive Luncheon will connect Awardees & Dignitaries

TEMETETTSÜ

1. Iba sentong nung Timsür (Usher) mapa inyaksü Kohima Ongpangkong Kaketshir Telongjem nem nüngloksür. i/c KOKT Ketdangpurtem.
2. Sentong temer lokli süngo ajemba mapang alitsü.
3. Capital Convention Centre kidang naro sobutsü enoktsü Kohima Ongpangkongsür Telongjem nem nüngloksür. i/c Ketdangpurtem.
4. Iba sentong takok aser temoatsü asoshi ajaki sarasadema atadi.



TIR YIMYIM YIMOBILEM (EDITORIAL)

DIMAPUR YANGTEPNÜ, MAY (MONUPII) 23, 2024

Modi aser Rahul na o atsütepa jembitsüla

- P Tiamongba Aier

Alima nung democracy tejentiba United States of America (USA) nung President inyaktsü tetokteper ana tsungda o atsüteptsü atema renemteper, saka alima nung democracy tulutiba nungbo Narendra Modi-i Rahul Gandhi den yimjak nung o atsüteptsü memulunger. Supreme Court nung taoba judge Madan B Lokur den Delhi High Court nung taoba chief justice AP Shah aser senior journalist N Ram nungeri Narendra Modi aser Rahul Gandhi na dang democracy dak sendakba tebilemstütem atema o atsütepa jembitsü mepishia liasü. Iba atema Rahul-ibo mulunga langzüogo saka Modi-i ola madoker. Modi-i magizükba sayua Bharatiya Janata Yuva Morcha president-i par party züngsem ka Rahul den o atsütepa jembitsü atema tenüng agütsüogo. Kijai tashi amshiba lennirtemi yimjak nung o atsütepa nung temulung magütsütsü kechiyong ibala lennirtemi tai kodanga maginütsü. Election nung toktepa political party tem nungi lennirtem tsungda yimjak nung o atsütepa jembibaji democracy atema kanga tajung aser tajangzük asütsü. Democracy linük ka nung olemtep aser o atsütep aliba ajanga dang inyaksangshi aser ketdangsübaren tajungba akümer. Election mapang lennirtem kati ka dak tai tongloktsüteper aser aitsüteper, anungji lennirtem sabang ka nung külemi noktaker o atsütepa jembitsübaji kanga shitak lir. Taküm elections mapang PM Narendra Modi-i Congress tenüng menüktsütsü atema onük aika jembir. Külen Opposition-ira Modi'er sorkar maneni arura Constitution raksatsütsü ta tetsübu aketba olen ka jembir. Anungji democracy ka nung nübertemi item onük ya shitak asü masü ta metettsü tim aser ibaji lennirtem ajurutepa o atsütep nung ang metettsü. Prime minister Modi-i pai asüngdangbatem melangzütettsü asüba agi pa den o atsütepa jembitsü memulunger ta Rahul-i shiogo. Rahul-i Modi dang pa Adani den tesentaktep aliba asüngdangtsü. Modi-i Adani nem airports, ports aser defence industry agütsüba den Adani atema Agniveer scheme tenzüktsüba asüngdangtsü ta Rahul-isa shiogo. PM Modi dang electoral bond ashikülak mapa, nübertem COVID wara agi kangshiba mapang auso akotentsü aser mobile phones yashitsü ayongzükba den Farm Laws 3 yangluba atema asüngdangtsü ta Rahul-isa ashi. Rahul-isa PM Modi den koba mapang südir o atsütepa jembitsü renema lir ta metetdaksüogo saka tang tashi Modi nungi telangzüba kecha mali aser iba tetezü pai o atsütepa mejembinür. Yimtenren mapa nung o atsütepa jembiba ya tim dang saka yimsüsürtemi telangzüba shitakbo magütsütsü akok. USA nung ama India nunga lennirtemi yimjak nung o atsütepa jembiba inyakyim tenzükttetra, iba ajanga sorkar ketdangsübaren len anitsü aser tajungba akümtsü. Anungji Lok Sabha election shilem ana anünga aliba mapang Madan B Lokur, AP Shah aser N Ram nungeri mepishiba agizüka PM Modi-ia Rahul amaji o atsüteptsü mulung nungbo iba ajanga India nung yimtenren wadang nung temelenshi tuluka bener arutsü aser election agibayim tajungba akümtsü imlar.

OLEMSABANG

Tanela sempet amshiyim nung tangatettsü olen kar

~ L. Kika Pongener.

(Yashi adok nungi...)

Tanela sempet akar taküm ka koda alitsü ;

Yakob-1:19. Kü meimba adianutem ya metetang, nisung shia tangashitsü kara-ang, aser tejembitsü meilungi sang. (Ajitetba aser anguba ajak yak-yakta mejembitsü indang ashir ta angateter). 1 Korint-9:27. "Saka ni tangar dang sayutysungir külen, ni kü sasa magizükalir ta sur, ni kü mang nung azüoker, aser ni iba lar kümdaktsür. (Tangar dang sayutsüngir külen asen taküm aser jakla yimya agibo liteta mesayura asen dak tangar metsüdaktsü).

Aseni bilemba o agi shin o mekümdaktsütsüla:

2 Peter-1:20-21. Kechiaser laishiba shin o kecha pei juri o agi ratettsüba masü, aji tamasa metetang. Kechiyong shin o kechasüdanga nisungi mulongba agi maru, saka Tanela Temeshi-i ajungshia nisungtemi Tsüngrem nungi jembir. Ezekiel-13:1-8. "Nisung chir Israel ainkartem anema shina jembiang, shirnoki pei mulongjang nungi ainkar o jembir parnok dang shiang, Yamai Kibuba Tsüngremi ashir, Tamashi ainkartem shirnoki kecha mongui pei shisatsü agi ainkar o jembir parnok aiatai. Parnoki amajok aser tiyazü purapujiogo, Kibubai parnok meyok sernung Kibubai ashir ta jembir. Ni mejembir sernung nenoki-bo, Kibubai ashir ta ashiba ya nenoki anguba amajok mangdang ka aser nenok sasa jembiba tiyazü o purapuji ka masü no ? Anungji Kibubai yamai ashir, Nenoki amajok jembir aser tiyazü mangdang angu nung, ajiang ni nenok anema lir". (Aseni bilemba aser aseni shinuba o agi Tsüngrem'er shinba o mekümdaktsütsüla ta laishiba nungjagi tejangja angateter).

Tanela sempet jilo beshira lendong :

T.Mapa-19:13-16. "Saka temenen tanelatem aritoka senzüba Yihuda nung kari temenen tanela aketbatem madak Kibuba Yisu tenung nung ayimtentsü meranga ashi, "Paul-i sayutsüngiba Yisu tenung nung adoktsü onoki ozüng agütsür". Idangji temenen tanela-i langzü, "Ni Yisu metet aser Paul-a metet, saka nenok shir ? Idangji temenen tanela aketba nisung jagi parnok dak pungloka parnok ajak akok, aser parnok iba ki nungjagi zübu keter aser mangsa jena ao. (Tanela sempet maka sernung aka ama jilo beshibaji lendong-a ta iba laishiba nungjagi küli tejangja angur).

Tanela sempet pei tajangzük angulen mekümdaktsütsüla :

Mathi-10:7-9. Yisui pa nutsüngtem nem pai tenyaba mapa inyaktsü nunglokja ashi, "Aser nenoki aodang, kodak yimli anasa lir ta shia sayutsüngiang". Shirangertem anepjang, tasürtem shia arudakjang, zütsüra aketertem meshitetjang, aser temenen tanelatem aridokang. Nenoki angati angu, angati agüjang. Nenok juli nung hon mesura taribi mesura sen teben. (Tanela sempet ya asen sen aadak luyim mesura tajangzük bushiba lenmang/mapa ka ama mekümdaktsütsüla ta laishiba nungjagi küli tejangja angur).

(Maneni asüng adok nung...)

**Iba Olemsabang nung lemsaba ken-o aser shisatsü ya iba ocet züluri
bilemba ken-o ama tazünger angateta agitsü mepishir**

Church of England-i lanurtem projects nung sen million aika indoker

May 22, 2024: Church of England-i lanurtem jenti ayongdentsü asoshi mission aser evangelism projects nung sen million aika indoker.

Yaküm Strategic Mission & Ministry Investment Board (SMMIB)-i Church of England nem project balala atema pound sen million 60 aser England nung kanga sensakertem yaritsü atema pound sen million 29 agüja liasü.

Tanurtem aser lanurtem anidena Arogo nütsüing kümdaktsüsi atema rangloker item senotsü amshir.

Kanga takok ngua inyakba projects rongnung 'church after school', community meals, baby hubs, mountain pilgrimages, mentoring aser discipleship programmes lir.

2014 küm nungi tenzüka Church of England-i Tenla kidangi arurtem kanga ajema akümba nokdangtsü aser nütsüing renloktsü atema mission aser outreach projects inyaka arur.

Tesüiba küm 10 tsüingda item project teimbaka kanga

takok ngua inyakogo, ta Church of England-i metetdaksü.

Tangbo Arogo tasen, Chaplain aser cafe churches 900 dak tema lir aser training agütsüba nung lenir tasen 4,000 dak tema shilem agir, ta Arogoi metetdaksü.

Strategic Development Fund kübok inyakba maparen balala ajanga tangbo Arogo nung nisung tasen 27,000 dak tema shilem agidar.

Church of England-i maneni taruba küm 9 tsüingda lanurtem ayongdentsü atema ano sen tali billion 1 indoktsü telemtetba agiogo.

Kirkstall nung putir aser Strategic Mission & Ministry Investment Board nung züingsem, Arun Arora-i, "Tesüiba küm ter tsüingda project balala takok anguba ajanga England tesem ajaklen tamangertem melenshir aser nisung aikati Yisu Khrista meteta taküm melenshir," ta ashi.

"Tesüiba küm ka nung onoki tanur aser lanurtem jenti Arogo nung anidentsü nükjidong yur inyak, aser tangbo süngjang


tanngtsü tenzüokogo," ta paisa metetdaksü.

Iba report okila nung Strategic Mission & Ministry Investment Board Chairman, Carl Hughes-i, "Iba ya mapang talangka atema asalentong yangluba investment programme ka lir aser Archbishops' Council and Church Commissioners-ia taruba küm 9 tsüingda ano pound sen billion 1 dak tali agütsüsi ta shiogo," ta metetdaksü.

"Arogo nung funding program tasenba kübok aikati shilem agitetba ajanga pelar. Board-i 2023 küm diocese 12 aser partner asem nem fund agüja liasü," ta pai metetdaksü.

"Senotsüji ajanga tanur aser lanurtem Arogo nung anasü agi teimba kümdaktsüsi nükjidong lir. Arogotem aser school tem nung tanur aser lanurtem anepalutsü aser youth workers apprentices aser chaplain training agütsüsi. Church of England-i yariba project aika kanga takok ngua inyakdar," ta paisa metetdaksü.

Kentener, Elvis Presley indang Laishiba ka auction asütsü



May 22, 2024: Kanga nungtugu kentener, asür Elvis Presley indang Laishiba ka auction asütsü (ayoktsü); pa asüba anogo nung pa yipten anasa Laishibaji liasü.

GWS Auctions-i ashiba agi, tang tashi nung nisung katibo iba Laishibaji dollar sen 30,000 agi alizütsü atemzüka lir, ajisüaka May 25 nungi tenzüka live auction asütsü.

"Laishiba nungji hon sentsü agi 'Elvis Aaron Presley' ta ajenloka lir aser Laishiba telung nungji tapak aika nung 'bookmark' lir. Iba dak alia Lai tekong aika nung asü-a lir aser item Lai tekongtem ajanga Elvis den jembü südi, ta bilemer,"ta

GWS Auction house-i metetdaksü.

Kolom agi asü-a aliba Lai tekongtem rongnung kaji Yob 31:24-26 densema lir. Iba Lai nung yamai shia lir- "Ni honji kü teimla ngudakja lira, aser hon temeja dang, Ni nü dak temelung alemer, ta danga shia lira; Kü rongsen ulu nung, Aser kü ket agi aika bena aru nung ni pelaa lira. Ni anü apudang, Mesüra ita jangjaa ayadang aji ngua."

Auction nungjisa Elvis'er kinünger, Patsy Presley-i züluba shidi ka densema lir. Shidi nungji yamai zülua lir- "Elvis' pilaa oadakba sülen mapang tatsüka tsüingda kübu-tambu Vernon (Elvis'

tebu) küna Graceland nung Elvis' takdangi tua pa meyong oset benteta aser bendena liasü. Elvis yipten anasa tekolaklen table tilaka nung oset asem liasü aser item rongnung Liashiba ka densema liasü. Osettemji bendenba sülen Vernon-i kü dang itemji rizünga ayutsü asüingdang saka tesüsa pai kü nem ajakji bendanga agütsü."

Auction House kibur, Brigitte Kruse-i Elvis indang Laishiba lai amer tangokba noksa ka Instagram nung lemsatapa liasü aser lai yamai zülua lir, "Auction asür kaji osettsüset ayokba dang masü. Nü teinyaktsü mapa inyakang, arung!"

ANO GO ABEN TSÜNGREM DEN

Amajok Nung Timtem

"Arung, asenoki Kibuba dangi meyipdi kechiyong pai shisatsü, aser pai asenok aneptsütsü. Pai azük aser pai asenok aleptsütsü" (Hosea 6: 1)

"Kechiba tajunger dak tamajung ataloker?" Iba tasüingdangba ya temulung süa melangzür. Laishiba nungi Tsüngrem yimya angatetba ajanga iba miim o lapoktsü sapi agütsür.

Ajaki Tsüngrem tenüing meteta lir. Jehovah-Jire aser Jehovah-rapha. Saka tenüing ka ajanga Pai pasasa jungkai adok. Jehovah-Makkeh, tetezü, "Ni Kibuba shibai azüker apushitsür" (Ezek. 7:9)

Tsüngremi metongshitsüba temoatsü indang Yob tembar kati ashi, "pai yirutsüaka, Pai ano aneptsü. Pai azüker saka pa teka agi aneptsür" (Yob 5:17-18). Anüingdang aser aonung anapronglaji Tsüngrem meyong (T. Ken 74; 16). Tsüngrem yimjung anogo, aser tokrong anogo: kata kata yanglu (Sayu 7: 14). Tajung aser tamajung ajak tematiba nungi lir (Aiatai 3:38).

Ibri tapu ajaklen Khristantem asoshi tapet lir. Khristan takümüji tasemtepba ka lir (Ibri 12: 1). Tasemtepertemi temang koba agi taret kümdaktsür, item menüingdakba taret ajak endoker tasemtepdaki ayir. Kodang menüingdakba mapa nung asenoki nokdaker, Tsüngremi mepelar, ain adoker. Sarasadem mapang auyadaktsüba nung pelaa malir. Asen taküm-i pa uludaktsüsi asoshi süngyanglu mapatem asen taküm nung melidaktsütsüla (Isa. 2: 17b, 18).

Nai mulungba timtem tokrong ajak aremstsü, Ne taochi kua.

USCIRF-i Eritrea nung Khristantem anema inyakba nokdangtsü mepishir

Washington, D.C, May 22 (Agencies): Tan hopta United States Commission on International Religious Freedom (USCIRF)-i ocet ka ajanga US sorkar dang Eritea linük nung yimsü temeden anema inyakba aser Khristantem anema inyakba nokdangtsü mepishiogo, ta International Christian Concern (ICC)-i metetdaksü.

Ocet nungjisa USCIRF-i Eritea nung tepuokdak alirtem dang kanga mejungi beshiba indang osang tejangja metetdakja lir.

"Eritrea sorkari Pastor Haile Nayzgi aser pastor Dr. Kiflu Gebremeskel na apuba sülen küm 20 jungogo," ta USCIRF Commissioner, Frank Wolf-i metetdaksü.

"Pastor ana apuba sülen ita ka shi lir Pastor Meron Gebreselasie-a apu. Parnok ajak tang tashi tepuokdak maochii ayuba ya tim masü. Putir Abune Antonios bo house arrest kübok lia 2022 küm arrshi küm 94 nung süogo. Eritrea nung ano tanga Arogo lenirtemibo yamaji kasa tia majangshitsüla," ta paisa metetdaksü.

Eritrea nung akhidang Khristan yimsü puti otsü junga lir aser linük temzüng nunga yimsü temeden agüja lir, ajisüaka sorkari ketdangsertemi Khristantem maneni

reshikangshir. Yimsü temeden kongshiba ozüingtem rongnung Eritrean Penal Code kübok Arrla 196 densema lir. Iba ozüing kübok tamangba yimsü telok kati sentong kar aitsübaji ozüing alema lir aser aibelenertembo ita trok nungi ita 12 tashi tepuokdak ayutsü.

Ano ozüing kaji Proclamation Number 73 lir aser iba ozüing ajanga tamangba yimsü dak sendakba inyaksangshi balala azüoktsü atema sorkar ketdangsertem nem temelaba agüja lir. Iba dak alia tamangba yimsü telok ajaki sorkar den register asütsüla.

Item ozüing ana kübok küm shia nisung noklang aika apur. Court nung ken o-a mangadangi nisung 500 dak temabo tepuokdak yua lir aser Tsüngrem mezüingmeshiba ozüing kübok ano nisung noklang aika tepuokdak puoka lir.

USCIRF-i züluba ocet nungji U.N. Human Rights Council (UNHRC)-i tiyongtsüi ia inyakba ajanga yaküm March ita nung Eritrea sorkari nisung 9 jail nungi chiokba indang shia lir.

Ajisüaka nisung noklang aika rongnungi ishika dang chiokba agi aika jashir, ta USCIRF Vice Chair, Frederick A. Davie-i metetdaksü.

"Eritrea nung tang tashi yimsü temeden kanga mejungi lir," ta Davie-isa metetdaksü.

AO OSHI ANGAZÜKDAK: TANÜ ANGAZÜKTSÜBA OJANG



Süngtsüung

(v) temelem asadanga (diagonal measurement)

* Süng mapa nung süngtsüung shitak asadanga inyaktsüla.

Süngtu

(n) Süng südaktsütsü atema tazüung nung teküp septokba (chipping off the bark at base of trunk)

* Alu nung süng tulu ajak süngtu jaktoka leper yutsü.

OLONG PAITEP # 6795

Grid for OLONG PAITEP # 6795 with numbers 1-16 in various positions.

TIPIEN

- 2. Auonung chiyongsü asenba
5. Mangyimba mapang
7. O tamendakdak
8. Peidak malangba
10. Juli
12. Sen ayudak
14. Tenük agi ajitet
15. Tamajung aküm
16. Apuso

LANGTSÜNGLEN

- 1. Lenmang
2. Aor kidong ka tenüung
3. Tenarong maten
4. A ___ g
6. Mopung apodoka
9. Tongtipang tagitsü
10. Menungra bilem
11. Aiür
13. S ___ k
14. T ___ r

OLONG PAITEP # 6794 TELANGZÜBA

TIPIEN :

- 1. Tesangra, 5. Mungo,
7. Kisen, 8. Salem, 12. Semki,
14. Kilem, 15. Kensü,
16. Sangpang.

LANGTSÜNGLEN :

- 1. Temesen, 2. Raksa, 3. Aon,
4. Aso, 6. Nile, 9. Alizüung,
10. Omen, 11. Lemta, 13. Ola,
14. Kin.

NAI-A YA METETTER MA



Telangana tsür Deepthi Jeevanji-i World Para Athletics Championships nung alima otsü tasen ka yanglutetogo. May 20, 2024 nü Kobe nung lai world record timing (55.07s) nung 400m asemteta Gold medal ngutetogo. Iba takok ajanga ali Paris Paralympics nung shilem agitsü atema jenjang nguogo. World Para Championships nung India nunger kati track nung gold mezüngbuba angubaji Deepthi lir.

Deckiajuli PF süngoajok seret nungat Rs 651 agi yokdok



Guwahati, May 22, 2024

(Agencies): Deckiajuli Tea Estate nung CTC PF grade ka seret nung Rs 651 aser tanga BP grade ka seret nung Rs 605 agi yokdokogo.

Bodbarnü Guwahati Tea Auction Centre (GTAC) nung J Thomas & Co ajanga süngoajok yokdokdang taküm atema jenjang teimtibai yokdokogo.

"Iba auction platform ajanga süngoajok tajung adokertemi süngoajok yokdokdang jenjang tajungtem angur" ta Guwahati Tea Auction Buyers Association (GTABA) secretary Dinesh

Bihani-i ashi.

"Deckiajuli-i yaküm dang nungi tajungba süngokjok yanglutetogo. Company-i talirtem nungi sen aruba ngua CTC quality tajungba kümdaktsütsü policy ka yanglu" ta Parry Agro Industries Ltd senior general manager (marketing), Joe Louis-i ashi.

"Deckiajuli-i kümshia süngoajok kanga junga yanglua arur. Iba ya Parry Agro team ajanga meranga inyakba aser mapa tajung inyakba den talirtem aser market agi nungitba

ajanga lir" ta Bihani-ia ashi.

Yaküm Haroocharai süngoajok seret Rs 705 aser Halmari seret nung Rs 670 agi yokdoka liasü.

"GTAC auction asüandang süngoajok 100 tema seret nung Rs 350-500 agi yokdoker. Iba tetezü talirtemi quality ajungba memeter" ta pai ashi.

"Taküm Guwahati Tea Auction Centre (GTAC) ajanga printing time ajema aküm. Tangbo tayokertemi süngoajok yoktetsü aser anogo 30 tsüungda sen angutsü" ta Bihani-isa ashi.

Manipur nung telungpur telok balala nungi züungsem 18 puogo

Imphal, May 22, 2024

(Agencies): Tesüiba hopta 18 tsüungda central aser state forces-i Manipur nung telungpurtem anema mapa tuluba inyaka arur.

Iba mapang tsüungda prangpong-injangtem aser Rs. 2.22 lakh tashi ngutetogo ta Bodbarnü ketsdangsurtemi ashi. PREPAK züungsem 3 ket nungi

Rs. 1.9 lakh angu. Parnok ya May 17 nü Thangal Bazaar nung apu.

Ano, public dang nungi tashiyim agi meshiba Rs. 30,000 tashi KCP (Taibanganba) züungsem 3 ket nungi ngutetogo. May 21 nü Thoubal district kübok Khongjom nung tesepek ka nung parnok apu.

May 16 nü KCP (Taibanganba) züungsem ka ket

nung Rs. 2, 500 bena aliba apu.

May 21 nungsa police-i Lamsang area nung RPF/PLA züungsem 6 tashi apu. Ano, Thoubal district nunga KCP (People War Group) züungsem 4 tashi apu.

Kasa mapang UNLF (P) züungsem 1 apu. UNLF (P) ya India sorkar den yimjung olemtep tagidak lir.

Lt Gen Tiwari-i Mizoram governor & Chief Minister na den ajurutep

Aizawl, May 22, 2024

(Agencies): Indian Army eastern command chief Lt Gen RC Tiwari-i Mizoram governor Hari Babu Kambhampati aser chief minister Lalduhoma na den senden balala menogo.

Myanmar den arrtsülen tensa reprangtsü aser Assam Rifles renemshitsü atema Lt Gen Tiwari-i tena den sendentem amen.

Lt Gen Tiwari den Army ketsdangsurtemi Raj Bhavan nung governor Kambhampati den ajurutep. Tenati India-Myanmar arrtsülen security indang tebilemstütem aser iba asoshi Assam Rifles-i renemshia alitsüba onüktem lemsatetep.

Army ketsdangsurtemi Governor den Assam Rifles-i arrtsülen maparen inyaktsü renema alitsü osang metetdaksü.

Lt Gen Tiwari-isa civil secretariat nung Mizoram chief minister Lalduhoma den ajurutep.

"Tanü ni Eastern Command nung General Officer Commanding-in-Chief Lt Gen



RC Tiwari den ajurutep. Künati AR ground amshitsü, Zokhawsang bypass road tajungba akümstü aser drug dak sendakba onüktem lemsatetep" ta Mizoram chief minister Lalduhoma-i ashi.

Mizoram-i Myanmar den kilometre 510 aser Bangladesh den kilometre 318 agi arrtsütepa lir.

Assam Rifles-i Myanmar arrtsü aser Border Security Force (BSF)-i Bangladesh arrtsü anüker.

February 2021 nung mitkartemi Myanmar sorkar atsüungdokba sülen Myanmar

kübok Chin state nungi refugeee 34,350 tashi Mizoram nung arua jenok.

Külen, Bangladesh kübok Chittagong Hill Tracts nungi lisopur 1433 tashi November 2022 nungi Mizoram nung arua jenoka lir.

Centre sorkari Arunachal Pradesh, Manipur, Nagaland aser Mizoram den arrtsülen Free Movement Regime (FMR) agientsü telemtetba agiogo.

Ajisüaka iba ya Mizoram aser Nagaland sorkartem den political party tem aser telok balalai magizüker.

Vietnam nung tir inyaksü To Lam shimogo

Hanoi, Monupii/May 22 (Agencies): Ochimashi maparen anema campaign tenzükba ajanga Vietnam tir menden nungi aluba sülen parliament ajanga public security minister To Lam ya tir inyaksü agizükogo.

Party ka dang aliba linük nung akhi mapang nungi inyaka aruba ama National Assembly nung ajaki mulunga arishi küm 66 tain Lam nem vote agütsü. National Assembly nung secret ballot atema iba mapa asoshi candidate pa kisung liasü. Taoba hopta ruling Communist Party-i pa shimba sülen iba vote ya agitepa liasü.

"Blazing furnace" ta jembiba ochimashi mapa inyaker bushia apuba mapang sorkar lenir aser shishilepartem densema nisung meyrirjang aika apu aser iba mapang steering committee on anticorruption indang deputy head inyaka alisang Lam-i tongti shilem agia liasü.

Lam-i Vo Van Thuong melen, shiba küm ka dang tir mapa inyaker March ita anena liasü. April ita ano aibelenba

aser metokmeperi mechi National Assembly chairman-a mapa yutsü.

Tir inyaksü jangjaba sülen mezüng ola adokba mapang pai parliament dang maneni ochimashi anema raratsü ta ashi.

Sorkar inyaksangshi nung tir shilem kangabo mali, saka linük nung "four pillars" ta ajaba tematiba jenjang pezü rongnung ka lir. Tanünga asem ya party tekolakba, ato kilonser aser parliament indang speaker lir.

Party nung tekolakba Nguyen Phu Trong indang küm pongu kümsük tasem buba 2026 nung atemtsü aser To Lam-i pa jenjang amshia tongti zülur akumtsü akok, ta Canberra nung aliba Australian Defence Force Academy nung Vietnam expert aser emeritus professor Carl Thayer-i ashi.

Lam ya mangatetep medeni tir menden ya atongba masü aser parliament-i pa public security indang minister meinyakdaksütsü telemtetba agiogo, kobai sorkar anemer aser activist tem meita repranger.

Sorkari civil society teloktem anema nokdaka arur aser activists 200 shi tepuokdak lir ta Vietnam nung rangloka aliba rights organisation The 88 Project ajanga ashi.

Lam ya Ministry of Public Security tekolak masü asünung, ato kilonser aser tongti zülur inyaksü asoshi tokteper Pham Minh Chinh ajemzuka yoktsü tashi maitba jenjang nung lir, ta Washington nung aliba National War College nung professor Zachary Abuza-i ashi.

2021 küm Vietnam nung COVID-19 lockdown mechi Lam ya London nung "Salt Bae" ta ajasang nungtugu sorochioker Nusret Gokce-i upload asüba video ka nung Lam-i hon tanük inoka aliba shi achiba ngua Vietnam nung nüburtem kanga ait adoktepa liasü. Ajisüaka iba video ya Gokce-i agiena liasü.

Mapang tatsüka lir noodle ayoker kati "Salt Bae" chiloshi ia noodle soup nung süngolio prokloksüba video ka ngur iba nisungba ya küm pongu atema tepuokdaka yoka liasü.

Ireland, Norway & Spain-i Palestine ya linük ka ama agizüktsü

Oslo, Monupii/May 22 (Agencies): Ireland, Norway aser Spain nungeri Bodhbarnü sangdong balala ajanga ashiba agi, parnoki Palestine ya linük ka ama agizüktsü. Linük asem nungi lenirtemi ano Europe nung aliba linüktem timbai kasa jenjang ya agitsü imlaba lemsatepogo.

Norway aser Spain nati Palestine ya linük ka ama May 28 nü formally agizüktsü. Norwegian foreign ministry-i ashiba agi, "kasa anogo Europe nung mulung ajemba linüktemi Palestine ya linük ka ama agizüktsü."

"Norway-i Palestine ya linük ka ama agizüktsü atema sorkari telemtetba agiogo. Rara tialong nung nisung meyrerjang aika yiruba aser asüba mapang ken o bentetsü atema Israel aser Palestine ta linük balala bendanga alitsüba dak alaka danga lenmang mali," ta Norway Ato Kilonser Gahr Støre-i ashi.

Iba osang sangdongba sülen minute ishika lir Spain Ato Kilonser Pedro Sánchez-ia, Parliament nung par linüki Palestine ya linük ka ama agizüktsü, ta ashi. "O agi dang masü saka mapa agi inyaka sayutsü mapang tongogo," ta pai ashi. Paisa iba telemtetba ya Israel mesüra Yihuda nunger anema masü mesüra Hamas pur pusema agiba masü, ta janjashitsüogo.

Ireland Ato Kilonser Simon Harris-i ashiba agi, iba telemtetba mapa akumtsü atema linük asem yagi tenüngdakba jenjangtem ajak agitsü. Paisa, taruba hoptatem nung linük timbai iba tongtipang jenjang ya agitsü ta temulung lema bilemer, ta ashi.

Iba osang sangdongba sülen

Israel-i ken o ashishitsü atema Norway aser Ireland dangi yoker aliba ambassador jaoka liasü. Israel foreign minister Israel Katz-i ashiba agi, par linük sovereignty jenjang mejungi kümdaksüba aser security lendongbang nung toktsürtem nungi parnok matsüngshitsü.

Spain-i iba osang mesangdong tsünga Katz-i, "iba dak sendakba nung Israel ajem ajema malitsü. Spain-i Palestine ya state ka ama agizüktsü atema tebilemba aliba sangdongra ibala mesükba jenjang ka parnok anema agitsü," ta ashi.

Norway-i iba telemtetba agiba rasa ashiba mapang Støre-i, Asia anüolen yimjung asoshi Palestinian state ya nungdaka lir.

"Peisasa telemtetba agitsü atema Palestine nunger fundamental, independent temeden lir. Israel aser Palestine na prongla pei linük nung yimjung nung alitsü temeden lir. Linük ana küma melemdangra Middle East nung yimjung malitsü. Palestine linük ka meküm tetra two-state solution malitsü. Middle East nung yimjung asoshi Palestine linük ka amenoktsü nungdaka lir," ta pai ashi.

Norway foreign minister Espen Barth Eide-i X sabang ajanga ashiba agi, Israel aser Palestine na atema yimjung asoshi two-state solution dak alaka tanga lenmang mali. "Iba amala tongtibang mapang ka nung yimjung asoshi onoki iba telemtetba ya agiogo," ta pai ashi.

Spain Ato Kilonser Sánchez-i April ita Ireland aser Norway semdangogo, koba iba telemtetba agiba indang külemi sangdongtsü atema inyakteptsü

asoshi liasü ta amanger.

Israel aser Palestine na tsünga mangatetep aliba bentetsü asoshi inyakyim nung Norway-i mapang talangka nungi shilem agia arudar aser 1993 küm Oslo Accords yanglutsü atema teyari agüja liasü.

Norway-isa, Oslo Accord mezüngbuba sign asüba sülen küm 30 dak tera tali süiba sülen tang Palestine ya state ka ama agizükba sangdonger, ta ashi. Iba tenangzüktepa agiba sülen Palestine-i two-state solution atema tongtibang jenjangtem agiogo, ta parnokisa ashi.

2011 küm World Bank-i, state ka ama inyaksangshitsü atema Palestine-i tongtibang tenüngdakbatem tongtetogo, aser nüburttem nem tongtibang service tem agütsütsü atema national institution tem amenokogo, ta ashi.

Linük 140 shi-i Palestine ya linük ama agizüka lir, kong UN nung Arab Group linüktem, Organisation of Islamic Cooperation (OIC) aser Non-Aligned Movement (NAM) densema lir. Ajisüaka US aser UK nati Palestine ya linük ka ama agizüka mali aser linük anaprongla ya UN Security Council nung permanent züngsem lir.

May 10 nü Palestine ya qualify süogo aser United Nations nung züngsem ka ama züngoksemtsü atema draft UN General Assembly resolution ka pusema vote agütsüba linük 143 nung India-a densema liasü.

Palestine ya linük ka ama agizükba linüktem rongnung India-a (1998) mezüngpur liasü. 1996 küm India-i Gaza nung "representative office" ka amenok aser iba sülen 2003 küm Ramallah-i belener ogo.

Pelaba Lemsateper



ASO: 13/11/1934

ASU: 17/05/2024

T. Bangersangla Imchen (Lirmen) Rtd Nurse.

Onoki teti miema aliba ojala T. Bangersangla Imchen shiranga aliba aser 17/05/2024 asüba mapang nung shirmokisa nübo, sarasadem, rongsen agi yaritepogo, nenok kija, kibong aser loktiliba ajak dang kanga pelaba metetdaksür.

Nenok kija, loktiliba ajak tulusang Tsüngremi tali moajangma.

Temiem, Chirnur, Anükapang & Semchirtem

Office of the Mopungchuket Village Council

P.O. Impur: 798615 Mokokchung

Tenüngsang Agütsür

Mopungchuket Medemsanger Putu Menden aser Village Council ajanga Wabong Er. R. Lobosang Jamir-i Nagaland sorkar kübok, Power Department nung Additional Chief Engineer menden tongtetba osang angashia pa nem tenüngsang aser tetushi tulu agütsür.

Iba den repsema, asen senso tajung lanurtem shirnoki Nagaland sorkar kübok tatidang balala nung takok nguteta mapa tajung ngutetogo nenok nema tenüngsang agütsür.

1. Takomeren Jamir & Tongpangkoka tena jabaso, Sp. Tialemba Jamir-i NPSC tatidang, CTSE (Agri. Allied & Others) nung takok ngua Planning & Transformation Department kübok Assistant Planning Officer (Class-II Gazetted) ajangzükte.
2. Moamangyang Aier-er jala aser Sarichuba Jamir kinungtsü Wt. Noktienla Aier-i Nagaland State Cooperative Bank Recruitment Examination nung Technical Assistant ajangzükte.
3. Yaryongdang Aier-er jabaso Sp. Rejumen Aier ajanga Nagaland State Cooperative Bank Recruitment Examination nung Banking Assistant ajangzükte.
4. Martsungba Aier-er jabaso Sp. Imlisong Aier ajanga Nagaland State Cooperative Bank Recruitment Examination Banking Assistant ajangzükte.

Nenok meranga inyakba ajanga süngjang tajung ajangzükte asen yimer ajak nenok takok nung pelasemer aser tejaktenteta noktaker. Tsüngremi nenok wadang aser taküm nung maneni takokba den anema aliba arishi nüburt tenzüktsü moaja len aniang ta asen yimer ajaki sarasademtsür.

| | |
|--|---|
| Sd/- Arimolung Aier Secretary Mopungchuket Village Council | Sd/- Akumjungba Lkr Chairman Mopungchuket Village Council |
| Medemsanger Putu Menden tenüng nung, | |
| 1. Imyumeren Jamir, TATAR | |
| 2. Kartoshi Aier, TATAR | |
| 3. Kumsangyanger Ozukum, TATAR | |

TEPELA LEMSATEPER

Kinunger yimtsüng nung 3th May 2024 yim maker ajanga koba kitsük kironng lendong tulu ajurua liasü, aser takoksa tulu nung nübortem temulung ani mesüngzükte ali dang, iba ama mapang nung Mokokchung District Administration-i anir yimtsüng aser town balala nungi yimden, Arogo, organization aser kija kibong shirmokisa, rongsen, nübo,shisatsü aser tamang sarasadem agi yaritepogo, nenok lokti aser kija shia dang ozü Kinunger Rionsganger putu menden aser Kinunger Baptist Arogo ajanga nenok ajak den kanga pelaba iba sangdong ajanga lemsateper. Tsüngremi nenok mapa tajung nung maneni moajang.

| | |
|---|---|
| Sd/- Kinunger Baptist Arogo Pastor | Sd/- Kinunger village council Chairman |
|---|---|

Russia-i anünglaki anti-satellite weapon yoka alitsü: US

Washington, Monupii/May 22 (Agencies): Taoba hopta Russia-i anüngleni satellite ka yokogo aser iba yagi iba ama danga satellite maktetsü akok ta US-i ashir.

"Russia-i low Earth orbit nung satellite ka yok aser ibai counter space weapon mesüka onoki asadangteter," ta Pentagon

odongtar Brig Gen Pat Ryder-i Mongulbar nikongdang ashi. Iba ya US sorkar indang satellite kasa lenmang nung lir, aser Washington-i iba tensa maneni asadangtsü aser kumzuka ayutsü renema alitsüla, ta pai ashi.

(Maneni tapak 8 nung...)

World Para Athletics: Mariyappan-i high jump nung gold angu



Monupii/May 22, 2024 (Agencies):

Tokyo Paralympics nung silver medal ngur alisang India nunger Thangavelu Mariyappan-i World Para Athletics Championships' nung T63 high jump asaya nung 1.88m jukteta gold angu aser Championship record tasen ka yanglua liasü.

Küm ti tsüingda pai tang mezüngbuba tongtibang asayamung ka nung gold medal nguogo.

Arishi küm 28 tain Mariyappan-i T42 high jump asaya nung 2016 Rio

Paralympics nung gold medal aser 2021 Tokyo Olympics nung T63 category nung silver medal ngua liasü. Paisa, taoba küm Hangzhou Para Asian Games nung T63 class nung silver medal ngua liasü.

T63 classification ya prosthesis ka inoker single through knee mesüra above knee limb deficiency keta alirtem atema lir.

Kasa asaya nung America nunger Ezra Frech aser Sam Grewe nati silver aser bronze medal ngua liasü.

Kasa anogo Ekta Bhyan-i,

tetsür F51 club throw tetoktepa nung gold medal nguogo. Lai club ya 20.12m merepteta liasü. Kasa asaya nung India tsürsa Kashish Lakra-i (14.56m) silver medal angu.

Ekta, shiba Haryana Civil Services (HCS) officer ka lir, lai Hangzhou Para Asian Games nunga bronze medal ngur lir.

Arishi küm 38 tain Ekta, shiba Haryana sorkar kübok HCS officer ka akümba sülen asaya tenzüka liasü, lai 2018 Para Asian Games, Jakarta nunga club throw asaya nung gold medal nguogo.

Ekta ya medicine nung career yanglunüa liasü, saka 2003 küm lendong ajuruba sülen iba nükjidong metongtet. Sonepat district kübok Kundli anasa tata gari kati la mena aliba gari dak tsükoksüba sülen yirua liasü.

La tongtoret yirua wheelchair nungi dang inyaksangshitsüsa aküm aser iba lendong nung kaketshir trok taküm sama liasü.

Cristiano otsüsütsüsa Euro nung 6benbuba asayatsü

Monupii/May 22, 2024 (Agencies): Taküm Germany nung asayatsü aliba European Championship nung otsüsütsüsa Cristiano Ronaldo trokbenbuba asayatsü renema lir.

Ronaldo ya Portugal team nung asayar 26 shimba rongnung densema lir.

Pa taoba European Championships nung asayaba sülen taoba Real Madrid teammate aser Spain nunger goalkeeper Iker Casillas den külemi iba asayamung nung ponguben asayaba record bener liasü.

Al Nassr nungi asayasang lenüisüba nung par national team-i 2016 küm Euro koka liasü.

Ronaldo ya tebur tetoktepa nung goal timtiba idaktsüba asayar lir. Pai tang tashi nung goal 128 idaktsür lir.

Taoba mapang Manchester United aser Real Madrid nungi asayar ya mezüngbuba 2004

küm Euro nung asaya liasü. Iba küm Portugal team final tonga asaya ajisüaka final nung parnoki Greece-i goal 1-0 agi mekoki liasü.

"Cristiano dak sendakba nung data indang jembiba tajungba asütsü. Pa ya par club nungi asayaba mapang asaya 42 nung goal 42 idaktsüba sayar ka lir, aser pa tang tashi asayatsü temsüa lir aser iba den bendenloksema pa dak onoki aginüba sempet lir," ta Portugal coach Roberto Martinez-Martinez-i Mongolbarnü ashi.

Portugal indang Euro squad nung ano arishi küm 41 tain defender Pepe densema lir. Taoba mapang Real Madrid centre-back ya team nung tambusang lir.

"Locker room nung Pepe shilem kanga tongtibang lir. Pa anema aliba mapangbo kanga tongtibang asayar ka lir. Onok dressing room kanga jangrademtsüka, kechiyong

asayartem putu balala nungi adenshia lir," ta Martinez-i ashi.

Portugal team taruba ita Finland, Croatia aser Ireland den warm-up asaya asem asayatsü. Parnok Euro 2024 nung Group F nung mezüngbuba asaya Czechia den asayatsü aser iba sülen Turkey aser Georgia den asayatsü.

Euro 2024 atema Portugal squad:

Goalkeepers: Diogo Costa, José Sá, Rui Patrício

Defenders: Antonio Silva, Danilo Pereira, Diogo Dalot, Goncalo Inacio, Joao Cancelo, Nelson Semedo, Nuno Mendes, Pepe, Ruben Dias

Midfielders: Bruno Fernandes, Joao Neves, Joao Palhinha, Otavio, Ruben Neves, Vitorinha

Forwards: Bernardo Silva, Cristiano Ronaldo, Diogo Jota, Francisco Conceicao, Gonçalo Ramos, Joao Felix, Pedro Neto, Rafael Leao.

Malaysia Masters: PV Sindhu tanabuba round-i iogo

Monupii/May 22, 2024 (Agencies): Bodhbarnü Malaysia Masters Super 500 badminton asayamung tetsür kija asaya nung Olympic nung medal ana tashi ngur alila P V Sindhu-i Scotland tsür Kirsty Gilmour straight game nung kokogo.

World No. 15 Sindhu, shiba Uber Cup aser Thailand Open nung masayai liasü, lai mezüngbuba round nung 21-17, 21-16 agi Gilmour koka liasü, shiba world No. 22 lir. Tena tsünga minute 46 asaya liasü.

India tsür la shibai

tatembangsa 2022 Singapore Open nung title ka bena lir, la taruba round nung Korea tsür Sim Yu Jin den asayatsü.

Kasa asayamung tarep temeyoktep asaya nung world No. 53 B Sumeeth Reddy aser N Sikki Reddy nata tanabuba round-i iogo. Mezüngbuba round nung tenati Hong Kong nunger tarep Lui Chun Wai aser Fu Chi Yan na 21-15 12-21 21-17 agi minute 47 nung koka liasü.

Kinungtsü aser kinungbo na ya tanabuba round nung Malaysia nunger top seeds

Chen Tang Jie aser Toh Ee Wei na den asayatsü.

Sindhu-i tang agi tasembenbuba Gilmour kokogo, shibai Commonwealth Games nung anben tashi medal ngur lir.

Sindhu taoba küm temekok yiruba ajanga mapang tatsüka masayai lir taküm küm tetenzük nung asaya tenzük, ajisüaka asayamung ishika nung takok monguteti aruogo. Paris Olympics masaya tsüingda la sasa dak temulung lemteta akümtsü asoshi iba asayamung nung junga asayartettsü imla atadar.

Archery World Cup: Tetsür compound team final-i iogo

Monupii/May 22, 2024 (Agencies): Yecheon (South Korea) nung Bodhbarnü archery World Cup nung World Number one India tetsür compound archery team-i takok tajung ngua fina-i iogo.

Ajisüaka World No. 1 tebur compound team-i imlaba ama masayatet aser World Cup Stage 2 nung bronze medal angutsü maongka aliba magitet.

Tetsür team nung Jyothi Surekha Vennam, Parneet Kaur aser Aditi Swami nungeri taoba ita Shanghai Stage 1 leg nung gold medal nguogo aser tang semifinal nung parnoki world no. 4 USA team 233-229 agi koka liasü.

Parnok tetsür compound team gold medal atema Honibarnü world no. 7 Turkey team den asayatsü.

Semifinal nung Turkey-i top-seed South Korea team 234-233 agi koka liasü.

Qualifying round nung tanabuba jenjang nung tembangba sülen India tetsür team bye nung quarters-i ai. Quarter final asaya nung parnoki Italy team 236-234 agi koka liasü.

Tebur team nung Priyansh, Prathamesh Fuge aser asayar

tejen Abhishek Verma nunger densema liasü. Parnok Mongolbarnü qualifying round nung pezübuba nungang liasü aser shoot-off nung parnok dang nungi tekübokba jenjang nung aliba Australia team 133-133 (10-10*) agi mekoki liasü.

Australia team ya world rankings nung jenjang 21buba nung lir, saka parnoki kanga junga asaya mezüng asaya nung point ka dang monguteti point 59 angu.

Australia team nung Bailey Wildman, Brandon Hawes aser Jonathon Milne nungeri maneni kanga junga asaya tanabuba round nung point ka agi tajemba aliba regulation four tashi nungbo 233 ta kasasa aküm.

Shoot-off nung team anaprongla point semermer ngur liasü saka India nunger asayartemi junga masayatetba mapang ka nung Australia nunger asayartem yagi Xs (arrows closer to centre) ana khashia bronze medal ngua liasü.

Mezüngbuba round nung Vietnam team 235-212 agi ayong ayonga akokba sülen India team-i taruba round ana nung Denmark aser top seed USA na shoot-off nung koka liasü.

BENDANGLI OSANG : Tapak 7 nungi...

Russia-i anünglaki anti-satellite weapon...

Iba atema Russia-i yimjak nung kecha sangdonga mali.

Moscow aser Washington ya alima nung tashi toktepa linük ana lir, aser tawa UN nunga space weapons mechi mangatettep adoka liasü aser linük anaprongi anünglak nunga nok-nü yoktsü meranger ta aitsüteper.

US-i anünglak ya "arena for military confrontation" kumdaktsütsü meranger, ta Mongulbarnep Russia indang foreign ministry odongtar Maria Zakharova-i ashi.

Technology dak tali metaloka aliba lima ka nung raratsü asoshi anünglak ya tesem ka akumtsü, ta mitkar tsütsü mongin temi mapang talangka nungi jembia arur.

"Russia-i taoba hopta anünglaki yokba satellite ya 2019 aser 2022 tsüingta yokba 'space payloads' mesüker," ta Gen Ryder-i Mongulbarnü ashi.

US Space Command indang odongtar kati ashiba agi, iba satellite - Cosmos 2576

- ya May 16 nü Moscow north tsütsü mile 497 shi pilar Russia indang Plesetsk cosmodrome nungi yok.

Russia indang Roskosmos state space agency ajanga sangdong ka nung ashiba agi, May 17 nü yokba ya Russian Federation indang defence ministry tejangraba nung lir. Parnoki launch vehicle Soyuz-2.1b amshi ta ashi.

Moscow time zone ya GMT dang ghonda asem agi tekeraba asünung anogo balala ya adoker alitsü.

Moscow mesüra Washington nungi iba dak tejangraba kecha mashi saka anünglak shisadanger temi ashiba agi Cosmos 2576 ya America indang USA 314 satellite indang lenmang kasa nung amai ajiteter.

2022 küm February ita nungi tenzüka Russia-i tashi ajak amshia Ukraine maka arudang Ukraine mitkar yariba US satellites tem dak tenük yoktsü akok ta Moscow-i tekumdangtsü shia arur.

BILEMDANGANG

"Nü mulung melenshitetra nü taküm melenshitettsü."